


knillis



de blienen eupen

knillis

de blienen eupen

gedichten

een uitgifte van de stichting stellingwarver schrieversronte
oosterwoolde 1984

disse gedichten bin schreven tussen 18 maart 1978 en
december 1983

inkelde gedichten hebben eerder in *de ovend* of in
de lyrische kraante staon

SSR-32

*niks uut disse utgifte mag opni'j drokt en/bf eupenbaor maekt
wodden op wat veur meniere dan ok zonder dat daor van te veure
schriftelik goedvienen van de schriever veur geven is
no part of this book may be reproduced in any form by print
photoprint microfilm or any other means without written
permission from the author*

© 1984 knillis

omslag knillis

drok stichting c.regenboog grunningen

ISBN 90 6466 038 7

hoe kuj' van iene eers holen
aj' niet iens van jezels holen

veur jim

ik bin niet meer
as doe ik vieve was
een lieve jonge
altied ree om jim te helpen

ik bin niet meer
as doe ik tiene was
een plezierige jonge
altied mit een vrund op pad

ik bin niet meer
as doe ik vuuftien was
een verlegen jonge
altied de beste wezen

ik bin niet meer
as doe ik twintig was
een maegiesschouwe jonge
altied in 't weekaende thuis

ik bin now meer
as hoe ik altied was
een lieve jonge
een plezierige jonge
een verlegen jonge
een maegiesschouwe jonge
seins ree om jim te helpen
seins mit vrunden op pad
seins nog wel es de beste
seins nog wel in 't weekaende thuus

mar now veural
van al die dingen
al vienen jim 't
ok goed of min

ik bin wie a'k bin

veurjaor

achttien meert
vandemorgen het et nog sni'jd
mar now now 't alweer aovend is
now wodt et weer wat beter
't veurjaor komt d'r an

oons laand
oons kaampien achter 't huus
ligt onder de sni'j
de sni'jklokkies d'r boven
't veurjaor komt d'r an

't schaop achter
het krek twie jonge laomer brocht
't jonge leven 't is d'r weer
mar niet bi'j mi'j
't veurjaor komt d'r an

al dat jonge leven
't schaop dat laomt
de voegel legt
'k begriep et niet
't is aenlik ja nog winter

regen

et was zo mooi vandemiddag
de zonne scheen et was straolend weer
mar doe wodde et donkerder
et begon al wat te miggelen
in de veerte za'k 'n regenboge
ik had mien raem een aentien eupen
en daor begon de storm
ik kreeg mit muuite 't raem weer dichte
et lokte en krek op 'e tied

en now regent et
buten mar ok binnen
binnen bij mi'j
buten wodt alles schone wasken
bij mi'j ok naor ik hope
alle muuilikheden die in mien heufd weren
ze wo'n votspuuld

in 't westen klaort et al weer op
alles is weer schone
et wodt weer zunnig
krek as in mi'j
et is goed zoe'n regenbujje
regende 't mar altied

kelinder

kelinder wiezer van de tied
waorum blief ik altied mar allienig
op mien zuuktocht naor gelok
gelok dat veur et griepen ligt
mar aj' et griepen is et vot

kelinder wiezer van de tied
waorum gaoj' zo keihad wieder
waorum hool ie nooit es still'
moej' dan altied iewig deurgaon
in jow rooftocht deur de tied

kelinder wiezer van de tied
waorum kan ik jow niet bi'jholen
waorum loop ie veerder op mi'j uut
mar ik geef mien inhaelwedstried
zonder veerder speulen op

kelinder wiezer van de tied
ik scheur mien laeste blattien of

lieve dood

oe lieve dood
de meensken zeggen vaeke
dat as ie doukies kommen
da'k dan mien hiele leven
nog een keer bekieken mag
dat al wa'k mitmaekt hebbe
nog 'n keer an mi'j veurbi'j komt

mar lieve dood
a'k now seins al es mit je vri'je
en ik dan mien ogen dichte doe
komt d'r hielemaole niks veurbi'j
liekt et as of ik in mien leven
nog nooit es echt wat mitmaekt hebbe
as of mien leven zinloos west het

oe lieve dood
kun ie mi'j misschien niet now alvast
een veurschot op mien leven geven

gien uutzicht

ie moe'n je holen bi'j waj' hebben
lödt 'n gezegde
mar ik hebbe niks
zol d'r dan gien iene wezen
die ok gien uutzicht het
of bin ik de ienigste
mit blienen veur de raemen

dichter

een dichter zonder inspiraasie
is as een ridder zonder jonkvrouwe
een jonkvrouwe kan 'k niet kriegen
dat ik bin mar dichter wodden
inspiraasie zat

ridder

ik bin een dolende ridder
op zuuk naor een jonkvrouwe
om veur te strieden
om van te holen

mar alle jonkvrouwen
hebben heur buusdoekien al vergeven

en roofridder wodden
wil ik niet
kan ik niet

ik zal wel iewig dolende blieven

waorum

ik wol je wel wat doen
mar ik kan niet
waorum niet aenlik
ik bin toch niet aandere
as 'n aander
ik kan 't niet uutperberen
want ik heb daor gien iene veur
en hoe kom 'k d'r an
ik heb et now tegen jow
mar ik weet niet ienend
wie aj' binnen
ik wol da'k je kon
mar nee
waorum aenlik

wol daj' hier weren

oe ik wol daj' hier weren
dichter as dat 't niet dichter kan
zo wi'k jow hebben
jow die 'k nog niet ken
die 'k misschien ok nooit kennen zal
mar waor as ik van wete daj' d'r binnen
waor as ik van wete dat aj' d'r binnen
daj' van mi'j holen zoas ik bin
daj' lachen omdat ik bliede bin
daj' goelen omda'k 't d'r stoer mit hebbe
daj' anvulen hoe as ik mi'j vule
daj' mien leven weer zin geven
daj' maeken da'k weer mit nocht warke
argens veur veur jow veur oons
ik zal je vienen
jow mit wie 'k mien leven dielen wil
oe ik wol daj' hier weren

bujjen

ik hebbe soms van die bujjen
da'k mi'j zo hopeloos vule
da'k mi'j zo allienig vule
da'k verlange naor
een aarm om mi'j henne
een haand deur mien haor
een mond op mien lippen
een lief tegen mi'j an

is dat now te vule vraogd
zol d'r dan gien iene wezen
gien iene die mi'j begriipt
gien iene die om mi'j geft

ik hebbe soms van die bujjen
alliend de laeste tied
regent et de hieltied an

et hoolt op mit zaachies regenen

vrouwluden

oe kon ik mar
in heur hatte
of in heur
bloesien
kieken

holen van

hool van jezels

is d'r temeensen iene

die van je hoolt

ik hool van je

ik hool van je
van je rooie haor
van je heldere ogen
van je lippen
die ik pruwen moch
van je daansen
van je lachen
van je
van jow

vleden weke kwam ik je tegen
op dat veur de rest zo saaie feest
we hebben praot lacht daanst
de aovend van oons leven
totdaj' votgongen

mar al bi'j' now ok zo wied vot
toch bi'j' ok dichte bi'j
uut mien oge
mar in mien hatte

ankeme weke zie 'k je weer
ik trille now al
as een schoelejonge
bi'j de eerste beurt
en misschien bin 'k dat ok wel

ankeme weke zie 'k je weer
heur ik je weer
vuul ik je weer

ik hool van je

weet

weet ik hool van jow
ok al laot ik et niet altied blieken
weet ik hool van jow
ok al kiek ik seins naor ere maegies
en breng ik wel es iene thuus
weet ik hool van jow
ok al geef ik et nooit toe
ik kan niet meer buten jow
ik weet me zonder jow gien raod
weet ik hool van jow
ok al krieg ik eers wel es honger
ik kom toch altied weer thuus te eten
weet ik hool van jow
ok al daenk ie seins van niet
weet ik hool van jow

verschil

ie kommen zo veer vot
mar ie bin hier toch mar
hier bin 'k je tegenkommen
hier bin 'k van je holen gaon
mar
ik bin stellingwarver
ie niet
ik bin karkelik
ie niet
ik bin blaank
ie niet
ik bin man
ie ok
d'r is 'n groot verschil
mar wat kan 't schelen aenlik

kot gedichien veur een hopeloze liefde

ik haat je

ik hool van je

vuuftien

ie bin pas vuuftien
toch hool ik van je
ie hebben al een vrund
toch hool ik van je
ie wonen zo veer vot
toch hool ik van je
ie geven niks om mi'
toch hool ik van je
ik wete 't is hopeloos
toch hool ik van je

te veer veuruut

ik daenk daenk ik

te veer veuruut

as ik een mooi maegien tegenkom

daenk ik altied drekt

an hoe et uutraeken zal

ontmoeting

op 't keuperdrokdraankschrieversplein
zag ik jow veur 't eerst
't was mit oold en ni'j
zo tegen een uur' of iene
ik docht dan ok mitien
dat is ze
daor 'k al zo lange op waacht
en dan zo mar in de naacht
staoj' daor veur mi'j
we weensken mekeer een zegend ni'jjaor
en ik daenk mit jow d'r bi'j
mar dan
dan zie 'k daj' niet as mi'j allienig binnen
en 'k loop mar sjokkende weer deur

verleuren weekaende

't leek weer zoe'n verleuren weekaende
mar doe zag ik jow
vri'jdags waj' d'r al
mar doe zag ie mi'j nog niet
doe haj' alliend oge veur 'n eer

zaoterdays ha'k jow dan op 't laest
ie hebben mi'j aenlik bi'jna versierd
en ik ik vun et goed prima
't is aenlik vremd mar waor
ik die nog nooit iene had hadde
hadd' now jow
ie weren d'r zomar inienend

zundags tegere in de bos
hoe waarm et ok was
nog waarmer tegen mekere an
ik zwiette mi'j dood
mar disse keer was 't zwiet van genot

en doe kwam 't ofscheid
't was niet wa'k mi'j d'r van veursteld hadde
zo koold en nochteren
ik was al bange da'k je kwiet was

en doe nao 'n weke zuken
he'k en jow tillefoonnummer
en de moed om dat te dri'jen vunnen
jow hattelike stemme
ik was drekt weer smoor
doe de ontnochtering
't was al te laete
ik heb nog nooit zoe'n beroerd weekaende had

onrustig verlangst

onrustig leup ik deur de straoten
daenkende dat leven gien zin had
ik was deur iederien verlaoten
gienend die wat veur mi'j over had

doe zag ik jow staon in de regen
je mooie blonde haor driefnat
ie knipoogden ik wodde verlegen
et boonsde hadder in mien hatt'

doe kwam die bus mi'j over 't mad
en ie hebben mi'j verlaoten
nog veurda'k je aenlik echt had
onrustig loop ik deur de straoten

vrouwludevleis

zi'j is weer vot
daor as ik van hul
en daor as ik misschien
ok altied wel van hollen zal
pattie meensken zeden et al
an jow zit gien vrouwludevleis
zol dat dan toch waor wezen

relaosie

zij luusterde wel
mar heurde mi'j niet
zij keek wel
mar zag mi'j niet
dat daorum
ik vuulde wel
mar raekte heur niet

doen

ik doe je wat zee ze
mar et ienigste dat ze dee
was dat ze de deure tussen oons
mit 'n rotklap dichte smeeet

as

as we mar die iene dag vergeten konnen
as we mar die iene dag overdoen mochten
die dag daj' zeden daj' zo niet leven konnen
dan kon ik jow die liefde geven diej' zochten
dan wol ik jow al mien perblemen uutleggen
dan zol ik jow al miene lieve woorties zeggen
as ie mar die iene dag vergeten konnen
as ik mar die iene dag
as

de klokke tikt deur

de klokke tikt deur
veerder is alles stille in huus
naodaj' mit 'n klap
de deure toe gooid hebben
de deure van oons huus
de deure van oons gelok

betekenen al die jaoren
dan hielemaole niks veur jow
moej' dan drekt de eerste keer
dawwe woorden kregen
vot-en-daolik van mi'j vot
hool ie dan niet meer van mi'j

en ok al mis ik je now al
ie moe'n mar niet rekenen
da'k je vraoge om weeromme te kommen
ik redde mi'j ok wel zonder jow
want de tied gaot wieder
de klokke tikt deur

woorden

as een zonne haj' een plak in mien hatt'
we hadden alliend oge veur mekeer
mar die morgen hadden we woorden had
die woorden die 'k zegd heb gongen te veer
iene keer ruzie en now bin 'k je kwiet
dag relaosie wat blift is ienzemhied

aangst

de angst wi'jt om et huus
waor as wi'j in leefden
waor as wi'j gelokkig in weren
totdaj' gongen

de angst wi'jt om et kiend
waor as wi'j veur leefden
waor as wi'j gelokkig mit weren
totdaj' gongen

de angst wi'jt ok om mi'j
waor kan ik veur leven
waor kan ik gelokkig om wezen
naodaj' gongen

de angst wi'jt om et touw
ik gao ok

naacht

de naacht
is now
ik waacht
op jow
veur jow
waacht ik
naor jow
smaacht ik

de wiend
et wi'jt
et kiend
et goelt
zo zaacht'
om jow
et waacht
op jow

vannaacht
bin 'k bang'
ik waacht
te lang'
een jaor
een tied
vandaor
ik schiet

et kiend
et goelt
de wiend
die wi'jt
de knal
veer vot
ik vaal
kepot

vannaacht
et kiend
et waacht
alliend

en nog altied wi'jt de wiend

en nog altied wi'jt de wiend
't is al weer een kienderleven
mar waor is mien kiend dan bleven
en nog altied wi'jt de wiend
kon ze dan mit mi'j niet leven
leut ze mi'j daoromm' alliend
en nog altied wi'jt de wiend
't is al weer een kienderleven

veurjaorskiend

veurjaorswiend
wi'jt over 't laand
ik geef mien haand
an et kiend

et kiend
dat ooit kwam
naodat ik heur nam
onder de veurjaorswiend

et kiend
dat ik verleur
et kwam deur heur

zij gong vot
ik vien et zo rot
veural veur et kiend

bliend

bin ik dan seins bliend
of is iene mit een kiend
seins toch hiel allierend

veertien daegen

ien keer in de veertien daegen
dan kom ie een dag bi'j mi'j
je mem die komt je dan brengen
mar ze kikt niet iens naor mi'j

ie vertellen over je mem
en over je ni'je oom
ik zit stiekempies te goelen
't liekt een aekelige droom

al praotend' en al speulend' gaot
de middag al gauw veurbij
je mem komt je weer ophaelen
ok now kikt ze niet naor mi'j

ik zwaai je nao en ik zeg tot
over veertien daegen dan
oe zag ik jow mar elke dag
wodd' ik weer je mem heur man

waorum bin we niet ien gezin
waorum gong 't mis tussen oons
waorum leut ze mi'j alliend doe
waorum gaf ze mi'j de boons

inhold

veur jim	6-7
veurjaor	8
regen	9
kelinder	10
lieve dood	11
eupen	12
zwarver	13
gien uutzicht	14
dichter	15
ridder	16
waorum	17
wol daj' hier weren	18
bujjen	19
vrouwluden	20
holen van	21
ik hool van je	22-23
weet	24
verschil	25
kot gedichien veur een hopeloze liefde	26
vuuftien	27
te veer veuruut	28
ontmoeting	29
verleuren weekaende	30-31
onrustig verlangst	32
vrouwludevleis	33
relaasie	34

doen	35
as	36
de klokke tikt deur	37
woorden	38
aangst	39
naacht	40-41
en nog altied wi'jt de wiend	42
veurjaorskiend	43
bliend	44
veertien daegen	45

